

Ni Pangulong
Henry B. Eyring

Unang Manuglaygay
sa Unang Panguluhan



Ang Tingug sang Ginuo

Ang Doctrine and Covenants nagaagda sang tanan nga katawhan sa bisan diin sa pagpamati sa tingug sang Ginuong Jesucristo (tan-awa sa D&C 1:2, 4, 11, 34; 25:16). Puno ini sang Iya mga mensahe, mga paandam, kag mga nagapaisog nga mga laygay nga ginhataq paagi sa bugna [revelation] sa pinili nga mga propeta. Sa sining mga bugna makita naton kon paano ang Dios sarang magsabat sang aton mga pangamuyo sang pagtuo paagi sa mga mensahe sang pagtudlo, paghidaet, kag paandam.

Sa aton mga pangamuyo ginahandum naton nga mahibaluan kon ano ang luyag sang Dios nga himuong naton, kon ano ang dapat naton himuong agud makasalapo sang paghidaet kag kalipayan sa sining kabuhi kag sa madason, kag kon ano ang yara sa aton palaabuton. Ang Doctrine and Covenants puno sang mga sabat sa subong nga mga pamangkutanon nga ginapamangkot sang ordinaryo nga mga tawo kag mga propeta sa mapainubuson nga pangamuyo. Sarang ini mangin isa ka importante nga giya sa pagtudlo sa aton kon paano magbaton sang mga sabat sa mga pamangkutanon parte sa aton temporal nga ikaayo kag wala'y katapusan nga kaluwasan.

Ang pagkamapainubuson kag pagtuo sa Ginuong Jesucristo amo ang yabi. Si Oliver Cowdery nagbaton sang sabat gikan sa Ginuo parte sa iya handum nga magbulig sa paglubad [translate] sang Libro ni Mormon: "Panendumga nga kon wala'y pagtuo wala ikaw sang sarang mahimo; gani magpangayo nga may pagtuo. Indi pagibalewala ining mga butang; indi magpangayo sinang indi mo dapat pangayon" (tan-awa sa D&C 8:10).

Sa liwat-liwat sa Doctrine and Covenants, ang Ginuo nagapangayo sang pagtuo kag pagpaubos antes Sia maghatag sang Iya bulig. Isa sini ka rason amo nga ang Iya mga sabat mahimo nga indi mag-abot sa paagi nga ginaaabot naton. Indi man ini sila pirme mahapos batunon.

Ang kasaysayan sang Simbahan kag ang mga inagihian sang aton mga katigulangan nagapakita sining kamatuoran. Ang akon lolo sa tuhod nga si Henry Eyring hugot nga nagpangamuyo agud mahibaluan kon ano ang iya dapat himuong sang iya mabatian ang ginpanumbalik nga ebanghelyo nga ginatudlo sang 1855. Ang sabat nag-abot sa isa ka damgo.

Nagdamgo sia nga upod niya sa lamisa si Elder Erastus Snow sang Korum sang Napulo'g Duha ka mga Apostoles kag isa ka elder nga ginhingadlan William Brown. Si Elder Snow nagtudlo sang mga prinsipyo sang ebanghelyo sa sulod sang halos isa ka oras. Dayon si Elder Snow nagsiling, "Sa ngalan ni Jesucristo ginamanduan ko ikaw nga magpabunyag kag ining tawo [Elder Brown] . . . magabunyag sa imo."¹ Nagapasalamat ang akon pamilya nga si Henry Eyring may pagtuo kag mapainubuson agud magbunyan sang 7:30 sang aga sa isa ka linaw sang tubig-ulan sa St. Louis, Missouri, USA, ni Elder Brown.

Ang sabat sa iya pangamuyo wala nag-abot sa isa ka mabatian nga tingug gikan sa Ginuo. Nag-abot ini sa isa ka palanan-awon kag damgo sa kagab-ihon, subong sa natabo kay Lehi (tan-awa sa 1 Nefi 8:2).

Ang Ginuo nagtudlo sa aton nga ang mga sabat sarang man mag-abot bilang mga balatyagon. Sa Doctrine and Covenants, gintudloan Niya si Oliver Cowdery,

"Yari karon, ihambal ko sa inyo hunahuna kag sa inyo tagipusuon, paagi sa Balaan nga Espiritu, nga magaabot sa inyo kag magatiner sa inyo tagipusuon" (tan-awa saD&C 8:2).

Kag ginpaisog Niya si Oliver sa sining paagi: "Indi bala nga nagpabatyag ako sang katawhay sa inyo kaisipan parte sining butang? Wala na kamo sing sarang mabaton pa nga mas dako nga saksi kundi gikan sa Dios." (Tan-awa saD&C 6:23).

Ang Doctrine and Covenants, kasaysayan sang Simbahan, kag ang kasaysayan nga gintipigan ni Henry Eyring sa iya misyon pagkatapos lang gid sang iya bunyag nagtudlo sa akon nga ang mga sabat sarang mabatyagan bilang mga paandam subong man bilang katawhay.

Sang Abril 1857, si Elder Parley P. Pratt sang Korum sang Napulo'g Duha ka mga Apostoles nagtambong sa isa ka komperensya sa ginatawag na sa karon nga Oklahoma, USA. Si Henry Eyring nagsulat nga ang kay Elder Pratt nga "kaisipan napun-an sang madulom nga mga pamensaron . . . , nga indi makakita sang palaabuton ukon bisañ ano nga paagi sang pagpalagyo."² Si Henry nagsulat sang masubo nga balita pagkatapos lang gid sadto parte sa kamatayon sang Apostoles. Si Elder Pratt nagpadayon gid sa iya panganglakaton wala'y sapayan sang mga nabatyagan nga peligro, pareho sa ginhimo sang Propetang Joseph sa pagkadto sa Carthage.

Panaksihon ko nga ang Ginuo pirme nagasabat sang mapainubuson nga pangamuyo sang pagtuo. Ang Doctrine and Covenants kag ang aton personal nga eksperiensiya nagatudlo sa aton sa pagkilala sining mga sabat kag sa pagbaton sini nga may pagtuo, bisañ ang ini direksyon, pamatuod sang kamatuoran, ukon paandam. Kabay nga pirme gid kita magpamati kag magkilala sang mapinalanggaon nga tingug sang Ginuo.

MGA TANDA

1. "The Journal of Henry Eyring: 1835–1902" (wala pa mabalhag nga dokumento yara sa tagsulat).
2. "The Journal of Henry Eyring: 1835–1902."

PAGTUDLO GIKAN SA SINING MENSAHE

1. Binagbinaga ang pagbasa sing dulungan sang mga parapo parte sa pangamuyo sa sining mensahe. Sam-tang nagabasa kamo, pangabaya ang mga miyembro

sang pamilya sa pagpamati sing maayo kon paano ginasabat sang Dios ang mga pangamuyo. Binagbinaga ang pagpanaksihon parte sa importansa sang pangamuyo.

2. Ang Doctrine and Covenants puno sang mga sabat sa mga pamangkutanon nga ginapamangkot sang mga tawo sa pangamuyo. Paano kon ang mga sabat sa ila mga pamangkot (mga bugna) wala gid masulat? Paisoga ang pamilya nga matun-an ang pagkilala kag pagsunod sang mga paggiya sang Espiritu. Pweude nila isulat ang ila mga panghunahuna parte sa pangamuyo sa ila mga journals.

LAMHARON

Pagpamati sa mga Paggiya

Ni María Isabel Molina

I sa ka gab-i ang akon bataon pa nga pakaisa nga babayi naglayas sa ila balay, gani dali-dali ko sia nga gin pangita. Samtang nagamaneho sang salakyan, nangamuyo ako nga buligan ako sang Espiritu. Nakahibalo ako nga ang Dios magasabat kag magagiya sa akon, kag gingtinguhaan ko nga magpamati sa mga paggiya sang Espiritu. Pero sang wala ako sing may mabatian, nagsugod ako nga mangin desperado kag nagbatay ng wala ako ginagiyahan sang Espiritu.

Bisan gusto ko nga magpalayo-layo sa pagpangita, nabatyagan ko nga dapat dira lang ako mangita sa lugar malapit sa balay sang akon pakaisa. Gani nagdesisyon ako nga maglibot liwat sa sina nga lugar. Sang pagpundo ko sa interseksyon, nakita ko ang bayhon sang isa ka bataon nga babayi nga nagalakat. Nakita ko ang akon pakaisa!

Sang naggwa ako sa salakyan kag nagdalagan sa iya, narealisar ko nga ang Espiritu gali nagasige na tudlo sa akon paagi sa pagpabatyag sa akon nga dapat ako magpangita sa amo lang nga lugar. Tungod nagapabot ako nga makabati sang malinong nga tingug, halos ko na mabale-wala ang mga paggiya sang Espiritu. Didto ko nahangpan nga sa madamo nga beses indi kita makabati sang tingug, kundi makabatyag kita sang mga paggiya sa aton mga tagipusuon.

Nagapasalamat gid ako sa paggiya sang Espiritu. Matuod gid nga yara Sia pirme! Pareho sang nasiling sa balaan nga mga kasulatan, "Ang Balaan nga Espiritu mangin

inyo dalayon nga kaupod" tan-awa sa D&C 121:46).

Kon takos ukon worthy kita sa paggiya sang Espiritu kag nagapamati kita, sarang kita mangin mga instrumento sa mga kamot sang Dios sa paghimo sang kaayuhan para sa madamo nga mga tawo. Sa dalayon nga pagpakig-upod sang Espiritu, mahibaluan naton ang dalan nga dapat agyan.

MGA KABATAAN

Isa ka Makagalanyat nga Eksperiensya sa Pangamuyo

Si Pangulong Eyring nagatudlo nga ang mga pangamuyo sarang masabat sa madamo nga mga paagi.

Sarang kamo makaangkon sang makagalanyat nga eksperiensya sa pagpangita sa balaan nga mga kasulatan agud matukiban ang pila sinang mga paagi.

Pangitaa ang tagsa ka balaan nga kasulatan sa idiom. Sa inyo journal, isulat ang pila ka mga tinaga agud ilaragway kon ano ang ginahambal sining balaan nga mga kasulatan parte sa mga sabat sa pangamuyo.

Sarang man ninyo isulat sa inyo journal ang inyo mga eksperiensya sa mga pangamuyo nga ginsabat.

Juan 14:26

Doctrine and Covenants 64:34.

Doctrine and Covenants 64:34.

Doctrine and Covenants 64:34.

Mga Hulubaton 8:10–11



Pang-misionaryo nga buluhaton

Tun-i ining materyal sing mainampuon kag, kon nagakabagay, hambali ini upod sang mga sisters nga inyo ginabisita. Gamita ang mga pamangkot agud buligan kamo sa pagpabakod sang inyo mga sisters kag himuong ang Relief Society nga aktibo nga bahin sang inyo mismo kabuhi.

Pagtuo, Pamilya, Bulig

Ang mga Santos sa Ulihing mga Adlaw ginpadala sa “pagtrabaho sa ubasan [sang Ginuo] para sa kaluwasan sang mga kalag sang tawo” (tan-awa sa D&C 138:56), nga nagalakip sang pang-misionaryo nga buluhaton. Indi naton kinahanglan ang pormal nga tawag sa misyon para magpaabit sang ebanghelyo. Ginapalibutan kita sang iban nga ang mga kabuhi mahimo pagabugayan sang ebanghelyo, kag samtang nagahanda kita sang aton mga kaugalingon, ang Ginuo magagamit sa aton. Ang mga visiting teachers sarang magbaton sang ila espirituhanon nga mga responsibilidad, kag magbulig sa “pagpahanabo sang imortalidad kag wala'y katapusan nga kabuhi sang tawo” (tan-awa sa Moses 1:39).

Sang gin-organisar sang Propeta Joseph Smith ang Relief Society sang 1842, nagsiling sia nga ang mga babayi indi lamang magtatap sang mga imol kundi magluwas man sang mga kalag.¹ Amo man ini gihapon ang aton katuyuan.

“Ang Ginuo . . . nagatugyan sang panaksihon sang kamatuoran sa ila nga magapaabit sini sa iban,” hambal ni Pangulong Dieter F. Uchtdorf, Ika-duhang Manuglaygay sa Unang Panguluhan. “Labi pa gid, ang Ginuo nagapaabot sa mga miyembro sang Iya Simbahan nga

‘magbukas [sang ila mga baba] sa tanan nga tinion, nga nagapahayag sang [Iya] ebanghelyo upod ang tunog sang pagpangalipay’ (tan-awa sa D&C 28:16). . . . Kon kaisa ang isa ka pahayag sang panaksihon sarang magpahanabo sang mga butang nga mag-apekto sang kabuhi sang isa ka tawo sa wala'y katapusan.”²

Gikan sa Balaan nga mga Kasulatan

Doctrine and Covenants 1:20–23; 18:15; 123:12

Gikan sa Aton Kasaysayan

Ang sugilanon ni Olga Kovářová sang sadto anay nga Czechoslovakia isa ka halimbawa sang pang-misionaryo nga buhat sang isa ka miyembro sa aton kasaysayan sang Relief Society. Sang mga tinuig nga 1970, si Olga isa ka estudyante sa pagkadoktor kag nagahandum sing mas madalom nga espirituhanon nga kabuhi. Natalupangdan niya ang 75-anyos nga si Otakar Vojkůvka, isa ka Santos sa Ulihing mga Adlaw. “Sa panulok ko daw sitenta'y singko anyos na sia pero sa iya tagipusuon daw halos dise-otso kag puno sing kalipay,” siling niya. “Indi ini kinaandan sa Czechoslovakia sa amo nga tion sang pagkanegativo.”

Ginpamangkot ni Olga si Otakar kag ang iya pamilya kon paano

nila nasalapuan ang kalipay. Gin-pakilala sia nila sa iban pa nga mga miyembro sang Simbahan kag ginhatahan sang Libro ni Mormon. Maukod niya ini nga ginbasa kag wala madugayi ginbunyagan kag ginkumpirmahan. Sugod sadto nga tion si Olga nangin isa ka impluwensya para sa kaayuhan sa isa ka kalibutan sang politikal nga opresyon kag pagpigos sa pagtulungan. Nag-alagad sia nga pangulo sang Relief Society sa ila gamay nga branch kag nagbulig sa pagluwas sang mga kalag sang iban paagi sa pagdala sa ila kay Cristo.³

MGA TANDA

1. Tan-awa sa *Teachings of Presidents of the Church: Joseph Smith* (2007), 453.
2. Dieter F. Uchtdorf, “Waiting on the Road to Damascus,” *Liahona*, Mayo 2011, 76–77.
3. Tan-awa sa *Daughters in My Kingdom: The History and Work of Relief Society* (2011), 92–95.

Ano ang Sarang Ko Mahimo?

1. Ginasunod ko bala ang mga paggiya sang Balaan nga Espiritu samtang nagapaabit ako sang akon panaksihon sa mga sisters nga akon ginabisita?
2. Paano ko bala ginabuligan ang mga sisters nga akon gina-bantayan nga magtuon sang ebanghelyo?

Para sa dugang nga impormasyon, mag-logon sa reliefsociety.lds.org.